

**ZAPISNIK**  
**O RADU PRVE RADNE SJEDNICE SKUPŠTINE KANTONA SARAJEVO ODRŽANE**  
**28.12.2022.GODINE SA POČETKOM RADA U 10,00 SATI**

Prvu radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

**Sjednici je prisustvovalo 31 zastupnica i zastupnika, kako slijedi:**

**SDA - STRANKA DEMOKRATSKE AKCIJE**

1. Dević Mahir
2. Kalem Adi
3. Kapidžić Faruk
4. Selmanović Faruk
5. Viteškić Smiljana
6. Zahiragić Haris

**POLITIČKA ORGANIZACIJA "NAROD I PRAVDA"**

1. Ademović Kemal
2. Čampara Aljoša
3. Kristić Danijela
4. Memić Arijana
5. Okerić Elvedin
6. Pobrić Rusmir
7. Vreto Elvis

**POLITIČKA ORGANIZACIJA GRAĐANA "NAŠA STRANKA"**

1. Bešlija Vildana
2. Handžić Vibor
3. Melank Miomirka
4. Uk Nihad

**SOCIJALDEMOKRATSKA PARTIJA BOSNE I HERCEGOVINE**

1. Avdić Samir
2. Čengiće Irfan
3. Čičić Davor
4. Magoda Kenan
5. Pekić Jelena
6. Stojanović Igor

**STRANKA ZA BOSNU I HERCEGOVINU**

1. Bandić Muamer
2. Gaković Elza

3. Gavrankapetanović-Smailbegović Fatima
4. Hodžić Admela
5. Šaljić Jasmin

#### **DEMOKRATSKA FRONTA**

1. Zuhrić Albin
2. Pilav Ilijaz
3. Vujović Vedrana

#### **POLITIČKA ORGANIZACIJA/INICIJATIVA “ZA NOVE GENERACIJE”**

1. Marjanović Damir

Izostanak sa ove sjednice opravdale su zastupnice Marijela Hašimbegović i Sanela Klarić.

Nakon intoniranja državne himne, predsjedavajući je pozdravio zastupnice i zastupnike u Skupštini Kantona Sarajevo, članove Vlade Kantona Sarajevo, sve prisutne u sali, kao i predstavnike medija koji prate rad sjednice.

Na osnovu članova 72. i 73. Poslovnika Skupštine Kantona Sarajevo, Kolegij Skupštine Kantona Sarajevo je na sjednici održanoj dana 16.12.2022.godine utvrdio dnevni red, a isti je dopunio na sjednici Kolegija održanoj dana 23.12.2022. godine.

*Dnevni red za Prvu radnu sjednicu Skupštine Kantona Sarajevo je usvojen jednoglasno (30 „ZA“) kako slijedi:*

1. Poslanička/zastupnička pitanja, inicijative i odgovori;
2. Prijedlog Odluke o privremenom finansiranju potreba Kantona Sarajevo za period od 01.01. do 31.03.2023. godine,
3. Prijedlog Odluke o davanju saglasnosti na Odluku o privremenom finansiranju Zavoda zdravstvenog osiguranja Kantona Sarajevo za period 01.01.2023. godine do 31.03.2023. godine;
4. Prijedlog Odluke o davanju saglasnosti na Odluku o privremenom finansiranju potreba Javne ustanove „Služba za zapošljavanje Kantona Sarajevo“ Sarajevo za period 01.01.2023. godine do 31.03.2023. godine;
5. Prijedlog Odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo;
6. Prijedlog Odluke o imenovanju predsjednika, zamjenika predsjednika i članova Odbora za javna priznanja Kantona Sarajevo;
7. Prijedlog Odluke o prihvatanju ostavke i razrješenju člana Odbora za žalbe javnosti Skupštine Kantona Sarajevo.

*Predsjedavajući je potom pozvao zastupnike da se izjasne o Zapisniku sa Konstituirajuće sjednice Skupštine Kantona Sarajevo.*

*Skupština je jednoglasno (30 „ZA“) potvrdila Zapisnik sa Konstituirajuće Skupštine Kantona Sarajevo držane 11.11, 21.11, 2.12. i 9. 12.2022.godine.*

## TOK SJEDNICE

Prije prelaska na realizaciju dnevnog reda, predsjedavajući je upoznao zastupnike sa odredbama Poslovnika Skupštine Kantona Sarajevo koje se odnose na prvu tačku dnevnog reda „Poslanička/zastupnička pitanja, inicijative i odgovori“, citiramo:

„Na svakoj redovnoj sjednici izdvojit će se sat vremena "Vladin sat" za poslanička i zastupnička pitanja na početku sjednice kojem obavezno prisustvuju premijeri i članovi Vlade. Jedan poslanik/zastupnik na jednoj redovnoj sjednici može postaviti najviše dva poslanička/zastupnička pitanja. Odgovori na poslanička/zastupnička pitanja mogu se davati usmeno ili pismeno. Poslanici u okviru tačke dnevnog reda "Poslanička pitanja i odgovori" imaju pravo i dužnost da pokreću inicijative iz nadležnosti Skupštine Kantona Sarajevo. Pokrenute zastupničke inicijative o kojima se Skupština izjašnjava traži se očitovanje Vlade Kantona Sarajevo. Izjašnjavanje o istim se odgađa za naredno skupštinsko zasjedanje kako bi Vlada mogla da se očituje o pokrenutim inicijativama. Ukoliko Vlada ne izvrši očitovanje po inicijativama o inicijativa će se izjasniti Skupština, bez stava Vlade, na narednoj sjednici. O zastupničkim inicijativa o kojima nema potrebe za očitovanje Vlade Kantona iste se odmah daju na glasanje i dostavljaju u proceduru. Poslaničke/zastupničke inicijative mogu se dostaviti u elektronskoj formi u toku sjednice, a najkasnije do zaključenja sjednice“.

Nakon uvodnog objašnjenja, prešlo se na realizaciju prve tačke dnevnog reda u 10,13 sati.

### AD – 1.

#### POSLANIČKA/ZASTUPNIČKA PITANJA, INICIJATIVE I ODGOVORI

Predsjedavajući je otvorio tačku i dao riječ zastupnicima.

**Zastupnik Mahir Dević je podnio sljedeće (citiramo):** „Za danas imam pripremljenu jednu inicijativu ispred Kluba Stranke demokratske akcije. Predmet: inicijativa, dostavljala se. Skupština kantona Sarajevo zadužuje Vladu Kantona Sarajevo da do kraja budžetske 2022. godine isplati jednokratnu novčanu pomoć radnicima u Kantonu Sarajevo u iznosu od 1080 konvertibilnih maraka, a kao pomoć u prevazilaženju inflacije koja je evidentna pojava u Federaciji i u Bosni i Hercegovini. Naravno o navedenoj inicijativi tražim da se izjasni Skupština Kantona Sarajevo, u skladu sa Poslovníkom. Ja ću je dostaviti sekretaru Skupštine i nadam se da će zastupnici u Skupštini Kantona Sarajevo navedenu inicijativu podržati jer kantoni koji imaju daleko manje budžete, evo kao što je Zeničko dobojski kanton, su navedenu inicijativu realizirali, pa evo očekujem od kolegica i kolega da daju podršku jednoj ovako inicijativi. Pitanje za ministra MUP-a Kantona Sarajevo. Evidentno u posljednje vrijeme postoji veliki broj prekršajnih naloga za parkiranje u općinama u Kantonu Sarajevo. Da li postoji neka posebna akcija koja podrazumijeva punjenje Budžeta Kantona Sarajevo? I zamolio bih ga zaista da da, naravno njemu je to teško sada da mi da odgovor usmeno, vjerovatno ću ja to traži ustvari pismeno, ali evo da obrazložim da mi se naprave uporedni podaci za 2021. i 2022. u smislu kazni u Kantonu Sarajevo. Znači, veliki broj građana se žali zbog ove stvari koja se dešava.

I pokrećem evo još jednu inicijativu. Znači da se izgradi, da se ovaj napravi ili sačini idejni projekat za izgradnju pješačke staze na potezu a od gradskog jezgra grada Ilijaša prema Mjesnoj zajednici Mrakovo. To je jedna velika Mjesna zajednica koja broji 1000 i više stanovnika. Imamo jedan put koji je od kantonalnog značaja, koji nema pješačke staze ni s jedne strani tako da postoji jedna ozbiljna opasnost u smislu sigurnosti učenika koji pohađaju osnovnu i srednju školu u Ilijašu. Evo od mene toliko, hvala. Ovu ću inicijativu na izjašnjenje dostaviti sekretaru Skupštine da glasamo o tome“.

**Zastupnik Haris Zahiragić je podnio sljedeće (citiramo):** „Imam dva pitanja i par inicijativa. Pitanja su i tražim usmeni odgovor od premijera ili ministra zdravstva ili i premijera i ministra zdravstva a vezano za inicijativu koju sam ja podnio, a ova Skupština usvojila prije pola godine, a vezano za zapošljavanje mladih doktora. Zašto nikada nije realiziran program, niti napravljen, niti realiziran program zapošljavanja svih mladih doktora u Kantonu Sarajevo. S obzirom na činjenicu veliki broj njih baš na prošlom konkursu u Domu zdravlja, veliki broj njih nije primljen i mislim da je sramota da mladi doktori nemaju priliku za prvo zaposlenje u Kantonu Sarajevo.

Drugo pitanje je za premijera i za ministra Štetu. Kada planiraju da dovedu u red javni gradski saobraćaj? Svjestan činjenice da oni imaju službene automobile, da žive u centru grada itd. Ne mogu svi ljudi na takav način se službenim automobila voziti. Ne postoje tramvaj mjesecima, zbog par dionica potpuno je tramvaj ispresijecan, potpuno je ukinut tramvaj kao prijevozno sredstvo. To se nije desilo od austrougarske. U ratu su tramvaji postojali, samo je ova Vlada učinila to već duži vremenski priroda, a proteklih par mjeseci nema nikako tramvajskog saobraćaja.

Inicijative koje podnosim jeste da Skupštine Kantona Sarajevo zaduži Vladu Kantona Sarajevo da odmah i bez odlaganja utvrde adekvatan program subvencija za energente: plin, drva, pelet, grijanje centralno putem Toplana u procentualnom iznosi koji će pratiti rast inflacije, a imajući u vidu poskupljenja svih energenata i ukupnu inflaciju u društvu. Dakle, inflatorni rast otprilike dvadesetak posto, Vlada to treba da bolje zna nego ja, za toliko da se subvencioniraju svi energenti i cijelo grijanje.

Druga inicijativa: da Skupštine Kantona Sarajevo zadužuje Vladu Kantona Sarajevo da odmah i bez odlaganja započne projekat uvođenja mjerača u sva domaćinstva koja su u sistemu javnog centralnog grijanja s ciljem ukidanja konačnog i zaostalog sistema paušalnog naplaćivanja usluga grijanja.

I treća inicijativa, po mišljenju možda veoma važna i očekujem od kolega da je podrže. Skupština Kantona Sarajevo zadužuje Vladu Kantona Sarajevo da obezbijedi finansijska sredstva za finansiranje svih troškova odbrane za sve optužene branioce u fingiranom predmetu Dobrovoljačka pred sudom Bosne i Hercegovine. Mislim da je to najmanje što je Kanton Sarajevo dužan da uradi ljudima koji su kada je najteže bilo u prvim danima agresije stali u odbranu ovog grada, a samim time i ove države. Mislim da Kanton Sarajevo do sada nije reagovao na takvu optužnicu, mislim da je najmanje što možemo jeste tim ljudima koji su, od kojih su mnogi od njih zaboravljeni od ovog društva, na neki način pomognemo da po stare dane, veliki broj njih su penzioneri, ne moraju od svojih penzija izdvajati i plaćati skupe advokate, jer oni time zapravo ne brane samo svoju čast, svoj ured, nego brane ugled i čast Armije Republike Bosne i Hercegovine, MUP-a Republike Bosne i Hercegovine, naše odbrane od agresije i generalno svih nas ovdje. I nadam se da će ta inicijativa prije svih biti podržana od strane svih kolega“.

**Zastupnik Irfan Čengić je podnio sljedeće (citiramo):** „Ja sam dostavio pismeno nekih 13 pitanja i inicijativa, da ne bih oduzimao ovdje vrijeme, ali imam dvije inicijative koje se tiču rada Skupštine, dakle ne Vlade, u kojima traži izjašnjavaње danas, odnosno odgovor na pitanje danas. Mi smo 11. novembra položili zakletvu dakle u Skupštini Kantona Sarajevo. Ja sam u ovih pedesetak dana pokušao da priprelim materijale koji su u proceduri a onda sam razgovoru sa sekretarkom Skupštine shvatio da zastupnici uopšte nemaju pristup materijalima u proceduri. Tako da danas dajem inicijativu da na dva načina riješimo taj problem, kao Parlamentarna Skupština Bosne i Hercegovine da napravimo na web stranici rubriku materijali u proceduri, gdje će sekretar i službe stavljati sve materijale čim dođu Skupštinu, stavljati u tu rubriku kako bi i građani i zastupnici mogli vidjeti sve materijale, a ne samo materijale koji su na dnevnom redu, jer ja ne znam za druge zastupnike, ali ja ne mogu adekvatno spremati materijala samo kad dođu na dnevni red. Ako je nešto već Skupštini, mislim da nema potrebe da se krije od zastupnika i komisije i zastupnici bi mogli puno bolji odraditi posao. Jedan takav primjer ste upravo vi izvršili na

posljednjem Kolegiju kada smo uvrstili tačku na Drugu redovnu sjednicu koja se tiče Devete transverzale i spajanje. Dakle nešto što je čekalo tri mjeseca u Skupštini Kantona Sarajevo. Zahvaljujući predsjedavajućem i Kolegiju smo završili za 5 minuta i uvrstili na dnevni red. Kada bi svi zastupnici imali pregled svih tačaka koje su skupštinskoj proceduri sigurno da bi i komisije puno bolje radile, puno bolje bi mogli zakazivati sjednice tokom čitavog mjeseca, a ne samo kada je zakazana sjednica. Dakle o toj inicijativi tražim da se Skupština danas izjasni jer ne traži ne zahtijeva mišljenje Vlade Kantona Sarajevo, niti iziskuje i kakva financijska sredstva. Dakle ili ćemo dobivati na e-mail sve materijale ili da se napravi na web stranici rubrika "materijali u proceduri" koja bi se punila hronološki, onako kako materijali i dolaze u parlamentarnu proceduru. A drugo je pitanje za rukovodstvo Skupštine. Kada će se na dnevnom redu naći nacrt Zakona o sportu jer je ministar 10. oktobra još uputio taj Zakon, zajedno sa Vladom utvrdio i dostavio ga Skupštini i mislim da je to jedan vrlo bitan zakon i predlažem da ga razmatra na trećoj redovnoj sjednici, kada god to bude. Ostalo sam dostavio pismeno sekretarki“.

**Zastupnik Damir Marjanović je podnio sljedeće (citiramo):** „Pozdravljam sve kolegice i kolege, kao i one koji prate ovo zasjedanje. Ajte da počnemo sa lijepim stvarima. Prije svega pohvalit ću rad kolege ministra Samira Avdića vezano za rekonstrukciju Collegium Artisticuma, nešto što 40 godina bilo ostavljeno onako kako jeste, nekada najveća galerija u bivšoj Jugoslaviji, ponovo dobija novi sjaj i zamolit ću ga da nam da malo informacija vezano za to, kao i kakvi su budući planovi po tom pitanju i rekonstrukcije tog dijela. Duga stvar gospodinu Hadžiahmetović zamolit ću ga da nam da malo informacija o ovome što Sarajevo gas danas prezentira, ako može s ovim novim SCADA softverom, šta će to značiti za građane Kantona Sarajevo, ali postaviti ću jedno konkretno pitanje možda čak premijeru primarno i zamolit ću za usmeni odgovor evo par informacija. Regulacionim planom Babin do na Bjelašnici je predviđen kao poslovna zona na kojem se gradi isključivo poslovni objekti za sport i rekreaciju. Općina Trnovo nakon izgradnje objekata, tehničkog prijema, izdaje upotrebnu dozvolu za poslovni objekat sa apartmanima i poslovnim prostorima. Poslovni objekat u smislu odredbi Zakona o prostornom uređenju Kantona Sarajevo je građevina sa isključivo poslovnom namjenom. Dakle svaki objekat koji je testiran kao apartman u sklopu poslovnog objekta ne može imati tretman stambenoga objekta obzirom na namjenu. Što se dešava? Većina komunalnih preduzeća su svoje usluge prodavali i prodaju po cijenama koje su namijenjene domaćinstvu, što je definitivno suprotno onome što je uređeno u Zakonu o komunalnim djelatnostima i njihovim tarifnih sistema. Pitanje koje definitivno sada postavljamo je: koja je razlika između poslovnog prostora u nekom objektu kolektivnog stanovanja u Sarajevu odnosno apartmana u poslovnom prostoru na Bjelašnici? Postavljam pitanje znači premijeru da li je upoznat s ovom situacijom i što se planira učiniti po tom pitanju? Mislim da će ljudi iz Vlade znati jasno posložiti koja je razlika između tarifa i svega onoga što poslovni i domaćinstva, poslovni objekti i domaćinstva plaćaju i na taj način to se reflektira na prihode komunalnih preduzeća. Takođe iskoristit ću priliku da dam jednu inicijativu, neće tražiti glasanje. Nadam se da će to biti usvojeno da na Trećoj sjednici znači Skupštine Kantona Sarajevo Vlada informira što je realizirano tj. koje su aktivnosti realizirane glede zaključaka tematskih sjednica o reformi obrazovanja i položaju mladih. Podsjetit ću sve na Skupština Kantona Sarajevo u prošlom mandatu je imala 2 tematske sjednice, donijela je jako konkretne zaključke vezano za reformu obrazovanja i za položaj mladih. Molim vas da u narednoj sjednici, na narednoj sjednici bude posebna tačka u kojoj će Vlada tj. resorna Ministarstva obavijestiti nas što je dosad urađeno i što se planira dalje raditi“.

**Zastupnik Nihad Uk je podnio sljedeće (citiramo):** „Srdačan pozdrav vama, kolegicama i kolegama u sali gledaocima koji nas prate dakle jednu ću inicijativu uputiti na današnjoj prvoj sjednici kantonalne Skupštine a to je da se izmijeni odluka o cijenama korištenja javnih površina, konkretno u dva člana: član 7 pomenute Odluke. Radi se o povlaštenom parkingu za stanare ulica određenih zona. Uporednim istraživanjem u regionu i širem regionu, može se zaključiti da građani

Kantona Sarajevo plaćaju višestruko više nego na primjer građani Beča gdje plate godišnju kartu u ekstra zoni 234 konvertibilne marke, u Beogradu 91 marku, u Pragu 88, u Zagrebu 300, a u Sarajevu je to 660 konvertibilnih maraka na godišnjem nivou. Dakle predložio sam određeni cjenovni razrede kako bi se članu 7 Odluke prilagodile iste cijene. I u članu 14 navedene Odluke da se napravi razlika u cijeni rezervacije parkinga, s obzirom da je po trenutnoj Odluci identična cijena za fizička i pravna lica. Mislim da je to nepravedno i da bi se trebalo napraviti razliku između fizičkih i pravnih lica, kako bi fizička lica manje plaća od pravnih lica rezervaciju samog prostora za parkiranje. Dakle to se radi na ulicama gdje se održava parkiranja od strane Javnog komunalnog preduzeća Rad“.

**Zastupnik Jasmin Šaljić je podnio sljedeće (citiramo):** „Ja bih postavio jedno pitanje za ministra unutrašnjih poslova vezano za natpise u novinama posljednjih mjeseci za lošu opremljenost poljskih službenika, da nam kaže koliko ima sindikata u Ministarstvu unutrašnjih poslova i dokle je nabavka opreme za policiju koja već godinama u fazi nabavke, gdje je to zapelo, šta mi možemo da pomognemo i da se osvrne na bezbjednosnu situaciju u Kantonu Sarajevo i da li imaju informacija o zloglasnoj grupaciji Wagner na našim prostorima, na prostoru Kantona Sarajevo?

Ima inicijativu vezano je za kolega Dević što je rekao za ovu naknadu 1080 maraka prema Vladi Kantona Sarajevo da iznađu i za sredstva za demobilisane borce. Znači to je kategorija koja prima 270 maraka mizerne naknade. Pa i njima je inflacija.

Sljedeća moja inicijativa je da se za Skupštinu Kantonu Sarajevo vezano za postavljanje zastava u svim javnim institucijama, objektima i objektima uslužnih djelatnosti. Znači zastave veličine registracije objekta, odnosno ID broja na vidnom mjestu.

Imao bi sugestiju za rukovodstvo Skupštine vezano upravo za zastave, iza vas predsjedavajući moraju da budu zastave Države, federalne, kantonalne. Moraju zato što često ovo mjesto zauzmu mediji, nije u fokusu za govornicom iza govornice moraju biti državne zastave. Mi nismo neformalna grupe građana, čak i oni imaju zastave. Ova zastava je nametnuta, ali tako je kako je. Ako već nema ljljana mi moramo čuvati ovu zastavu. Ako je mi ne budemo čuvali ovo je gotova stvar“.

**Zastupnik Samir Avdić je podnio sljedeće (citiramo):** „S obzirom da se prvi put javljam najprije da pozdravim vas prisutne i one koji protiv naš rad putem medija.

Ja bih danas da vratim u fokus jednu temu o kojoj je govorio ovaj kolega Stojanović prije nekih 2,5 godine, a radi se o jednoj vrlo opasnoj nelegalnoj deponiji u prvoj vodozaštitnoj zoni između Sokolović kolonije i Hrasnice. Kolega je tada upozoravao, slao zahtjeve prema Upravi za inspeksijske poslove Kantona Sarajevo. Ja sam kao vijećnik slao i zahtjeve prema Agenciji za slivove rijeke Save, međutim problem nije riješen. On ustvari u posljednje vrijeme postaje i još opasniji. Ono što ja predlažem ovoj Skupštini jeste da Skupština zaduži Upravu za inspeksijske poslove, kao i da pošalje dopis ovoj federalnoj Agenciji s obzirom da i jedna i druga institucija ustvari izbjegavaju nadležnosti i prebacuju jedni na druge, s obzirom da se radi istovremeno i vodozaštitnoj zoni i o koritu rijeke koja je u slivu rijeke Save. Osim što se radi o ekološkom problemu, radi se i o problemu korupcije, te smatram da bi se u ovaj problem trebalo uključiti i MUP Kantona Sarajevo i Ured za borbu protiv korupcije, s obzirom da se s vremena na vrijeme na istom lokalitetu vrši i nelegalna eksploatacija šljunka. I čudi me da odgovorne osobe iz Vodovoda i kanalizacije već evo nekoliko godina šute na ovaj problem iako se radi o prvoj vodozaštitnoj zoni, tako da bih iz ove skupštine poslao molbu i njima da nas obavijesti o svojim informacija u vezi sa problemom i šta su do sada u vezi s tim uradili. Također zamolio bi da iz Zavoda za javno zdravstvo urade analizu vode i analizu zemljišta da bismo na taj način osvijestili i ovu Skupštinu i sve spomenute institucije o opasnosti koja postoji u ovom problemu. Molio bih da se sve ove informacije Skupštini dostave za treću redovnu sjednicu“.

**Dopredsjedavajuća Danijela Kristić je podnijela sljedeće (citiramo):** „Zahvaljujem predsjedavajući. Pozdravljam sve prisutne gledaoce kraj malih ekrana. Ja za danas sam pripremila 3 inicijative. Prva je znači na osnovu molbe Javne ustanove Psihijatrijska bolnica Kantona Sarajevo dostavljam Prijedlog plana realizacije otvaranje dnevne bolnice za preventivni terapijski program za pacijente sa posttraumatskim poremećajem, kao i pacijente sa stresom i traumom uvjetovanim poremećajem. Detaljan plan potrebnih sredstava za ovaj projekat, kao i prihoda očekivanih ću dostaviti pismeno.

Druga inicijativa ide prema Federalnoj upravi za inspeksijske poslove.

Molim da izvršite nadzor nad radom Zavoda za javno zdravstvo Federacije Bosne i Hercegovine. Kao što je poznato na tržištu su se pojavile flaširane vode koje su sadržavale nedozvoljene bakterije. Molim da u nadzoru utvrdite koja je laboratorija vršilo ispitivanje spornih flaširanih voda, te da li laboratorija ovlaštena i akreditovana za vršenje takvih analiza? Također molim da u nadzoru izuzmete kopije analiza spornih voda i iste mi dostavite a sve u cilju istinitog informiranja javnosti i zaštite zdravlja građana.

I treća inicijativa. Na osnovu molbe etažnih vlasnika naselja "Bulevar" Stup a nakon krađe hidrantskih crijeva iz naselja, stanari su me zamolili da se njihovo ime obratim općini Ilidža za pomoć u nabavci nedostajuće protiv požarne opreme kako bi se zaštitili njihovi životi i imovina od požara, a već su imali neugodna iskustva sa istim. Ostalo ću dostaviti u pismenoj formi. Hvala“.

**Zastupnik Kenan Magoda je podnio sljedeće (citiramo):** „Imam samo jedno pitanje koje ću dostaviti. Putem e-maila, ne treba se sada odgovarati usmeno. A prije samog postavljanja pitanja želim da čestitam ministru privrede gospodinu Adnanu Deliću i direktoru kompanije ZOI' 84 Jasmin Mehić što su nakon 6 godina hrabro, odlučno ušli u postavljanje četverosjeda na mjestu gdje mu pripada. Moje pitanje se odnosi koliko je to ukupno koštalo Budžet i Vladu Kantona Sarajevo. Kada kažem Budžet mislim na prvobitni projekat koji nažalost nije uspio iz dobro poznatih razloga kojeg smo stalno delegirali putem medija i sada izmještanja. Znači koji ukupan iznos koji je plaćen da bi četverosjed bio funkciji skijaša, bordera, planinara, ljubitelja skijanja“.

**Zastupnica Admela Hodžić je podnijela sljedeće (citiramo):** „Postavljam pitanje ministru komunalne privrede, infrastrukture, prostornog uređenja, građenja i zaštite okoliša gospodinu Enveru Hadžiahmetoviću koje se odnosi na javni poziv za subvencioniranje rješavanje stambenog pitanja mladih Kantona Sarajevo. Tačka 2 stav c) u kojem stoji da mlada mladi ljudi imaju prebivalište na području Kantona Sarajevo neprekidno u trajanju od najmanje 3 godine prije podnošenja zahtjeva. Ono što interesuje mlade ljude Kantona Sarajevo kod ovog uslova jeste sljedeće: zbog čega i na osnovu kojih parametara je određen ovaj uslov u javnom pozivu o prebivalištu u trajanju od najmanje 3 godine? Da li su mladi koji imaju prebivalište Kantonu Sarajevo duže od 3 godine vrijedniji od onih koji nemaju te 3 godine prebivališta u Kantonu Sarajevo ili čak od onih koji žele i planiraju započeti i osnovati porodicu i nastaviti živjeti u Kantonu Sarajevo? Da li su mladi mogli prijaviti prebivalište kako žive i rade ili studiraju u Kantonu Sarajevo ako nemaju vlastitu nekretninu? Mladi pitaju kakva se poruka šalje mladima ako iz drugih gradova Bosne i Hercegovine koji rade ili studiraju u Kantonu Sarajevo i planiraju preseliti kupiti nekretninu i ovdje osnovati porodicu i nastaviti živjeti ako im ovakvim uslovima ne damo ni priliku da apliciraju za ovu vrstu pomoći? A također pitaju zašto Vlada Kantona Sarajevo i resorno Ministarstvo u ovome ne vidi jedan oblik strategije Kantona Sarajevo za zadržavanje mladih ljudi i pomoć ovoj populaciji. Evo mi pretpostavljamo da je odgovor ovaj može neka vrsta zloupotrebe ali ja vjerujem da će ministar detaljnije odgovoriti zato molim za usmeni odgovor“.

**Zastupnica Mimirka Melank je podnijela sljedeće (citiramo):** „Zbog zadovoljavajuće epidemiološke situacije u Kantonu Sarajevo krizni štab Ministarstva zdravstva Kantona Sarajevo. 21. decembra je održao sjednicu na kojoj je donesena odluka da se dozvole posjete pacijentima u ustanovama bolničkog nivoa u Kantonu Sarajevo uz poštovanje mjera zaštite koje su još na snazi. Krizni period covid epidemije je odavno prošao. U cijeloj Evropi je praksa posjete bolesnicima u bolnicama uspostavljena još prije više od godinu dana, samo je politika rigoroznih mjera ostala u primjeni u nekim medicinskim ustanovama u Bosni i Hercegovini čime se boljitak i oporavak pacijenata značajno usporava. Pitanje je kada će biti sprovedena Odluka kriznog štaba Ministarstva zdravstva Kantona Sarajevo i biti dozvoljene posjete pacijentima u bolnici Univerzitetskog kliničkog centra i drugim bolnicama u Kantonu Sarajevo?“

**Zastupnik Faruk Kapidžić je podnio sljedeće (citiramo):** „Imao bih jedno pitanje za ministra Hadžiahmetovića, pa i za Vladu ili premijera s obzirom da smo juče iz javnog informisanja sa nekih portala obaviješteni da je počela izgradnja stambenog kompleksa od 777 stanova i 900 parking mjesta na području nekadašnje ovaj fabrike Milkos, interesuje me da li je Ministarstvo izdalo ikakve dozvole vezano za to, odnosno da li je da li se ušlo u izmjenu urbanističkog plana, Regulacionog plana, obzirom da je to bilo potrebno, i da li je ovaj išta reagovalo prema nelegalno izdatoj ovaj nelegalno izdatoj okolinskoj dozvoli od federalnog Ministarstva okoliša s obzirom da kada sam ja bio u u Ministarstvu, odnosno kada sam vodio Ministarstvo dva puta smo dali negativno mišljenje Federalnom Ministarstvu, a bez tog mišljenja kantonalnog odnosno Ministarstva Kantona se nije moglo izdati. Znam da je na dan kada kada smo bili smijenjeni da je federalno Ministarstvo ipak izdalo tu dozvolu. I interesuje me da li je od tada do sada, do izdavanja građevinske dozvole, Ministarstvo ovaj kantonalno izdalo ikakvu okolinsku dozvolu za taj objekat? I šta će poduzeti po pitanju tog objekta obzirom da je nelegalna građevinska dozvola?“

**Zastupnik Muamer Bandić je podnio sljedeće (citiramo):** „Prema mojim informacijama Izmjene i dopune Finansijskog plana prihoda izdataka Javne ustanove Služba za zapošljavanje Kantona Sarajevo je usvojen od strane Upravnog odbora i Nadzorni odbor je dao saglasnost na taj, na te izmjene. Takođe sva prethodna, sve prethodne saglasnosti su dali Ministarstvo za rad i socijalnu politiku i Ministarstvo za financije. Pa me zanima kad se ta tačka dnevnog reda naći na Skupštini i ukoliko nije evo da kažemo još utvrđeno kad će se naći, pokrećem inicijativu da se na prvoj sljedećoj sjednici Skupštine Kantona Sarajevo ta tačka nađe na dnevnom redu“.

**Zastupnica Elza Gaković je podnijela sljedeće (citiramo):** „Upućujem inicijativu vezanu za Ministarstvo komunalnih poslova. Inicijativa se odnosi na idejni projekat koji je firma Enova uradila za izgradnju fekalne odnosno odvod fekalne kanalizacione mreže za područje mjesnih zajednica Zabrđe i Dobroševići. Ono što je ova firma predložila je konstantno odbijano od strane Zavoda za planiranje i Vodovoda kanalizacije, a mi zaista zbog hitnosti onaj problema i jednog zahtjeva građana gdje metar kanalizacione mreže ovim naseljima ne postoji, tražimo odobravanje ovog rješenja. Ujedno ovo bi riješilo jedan ogromni problem kada je u pitanju Regionalni centar za upravljanje otpadom jer mi znamo da pročištač procjednih voda iz trupa deponije ne funkcioniše, a ujedno i ovo je rješenje koje bi zaista pomoglo da se konačno i ovaj problem riješi“.

**Zastupnica Vildana Bešlija je podnijela sljedeće (citiramo):** „Ja bih imala par pitanja za Vladu a možda konkretno evo za premijera kakvo je generalno izvršenje budžeta i kakve su mogućnosti za isplatu jednokratnih naknada? Znamo da je veliki pritisak javnosti po ovom pitanju, evo smo čak imali ovdje na sjednici ovaj takva pitanja. Koliko ćemo izgubiti novca u

Budžetu kada stupi na snagu Zakon o pripadnosti javnih prihoda? Koliko je ukupno bilo povećanje plata u javnom sektoru u ovoj godini i koliko će biti 23. 12. u skladu sa dogovorom sa sindikatima i novim kolektivnim ugovorima? Kako i koliko često su se mijenjali kolektivni ugovori granskim sindikatima zadnjih godina? I koliko su u ovoj godini povećane plata recimo učiteljima, policajcima ,medicinskim sestrama na primjer i ostalim koje su obuhvaćene ovim načinom a ovaj primanja plate. Hvala vam puno. Molim objedinjenu informaciju u pisanoj formi“.

**Dopredsjedavajući Vibor Handžić je podnio sljedeće (citiramo):** „Imam dva zastupnička pitanja i jednu inicijativu. Prvo pitanje upućujem Ministarstvu finansija. Interesuje me u kojoj je fazi priprema Zakona o porezu na promet nekretnina i porezu na nasljeđe i poklone s obzirom da smo prije određenog perioda usvojilo Nacrt tog zakona. Prošla je faza javne rasprave pa eto, tražim pismeni odgovor da mi se dostavi u kojoj je fazi izrada konačnog prijedloga zakona. Također me zanima u kojoj je fazi priprema novog Zakona o upravljanju zajedničkim dijelovima zgrade. Mislim konkretno ono što se popularno kaže Zakona o upraviteljima, s obzirom da smo na jednoj od prethodnih sjednica ima li ovaj dokument na dnevnom redu koji je povučen? I imam jednu inicijativu koju je 2019. godine pokretala zastupnica Kerla a kasnije je tu inicijativu pokretao i Savjet mjesne zajednice. Dakle inicijativa o postavljanju svjetlosne signalizacije i stacionarnog radara radara pardon u blizini osnovne škole Stari Ilijaš u Ilijašu. Inicijative su pokretane na Ministarstvo saobraćaja Kantona Sarajevo. U odgovoru Ministarstva saobraćaja rečeno je s obzirom da je u pitanju regionalna cesta da nije nadležnost konkretno Ministarstva nego Direkcije za ceste Kantona Sarajevo i da se i Savjet mjesne zajednice i zastupnica Kerla obrate Direkciji za ceste. Evo to do sada koliko znam nije učinjeno i ja u njihovo ime ovom prilikom podnosim ovu istu inicijativu Direkciji za ceste Kantona Sarajevo“.

Nakon iscrpljene liste prijavljenih za pitanja i inicijative, uslijedilo je obraćanje članova Vlade kako bi dali odgovore na pitanja za koja je tražen usmeni odgovor. Prvi se Skupštini obratio ministar za boračka pitanja Omer Osmanović, zatim ministar unutrašnjih poslova Admir Katica, ministar komunalne privrede Enver Hadžiahmetović, ministar kulture i sporta Samir Avdić, ministar privrede Adnan Delić, sekretar Ministarstva zdravstva Amra Isić i na kraju premijer Edin Forto.

Nezovoljstvo odgovorom premijera iskazali su zastupnici Mahir Dević i Jasmin Šaljić.

Potom je uslijedila kraća diskusija između zastupnika Kemala Ademovića, zastupnika Mahira Devića i predsjedavajućeg Elvedina Okerića.

Predsjedavajući je kazao da su izdvojene četiri inicijative zastupnika Devića i Zahiragića za koje treba izjašnjenje Vlade.

*Pozvao je zastupnice i zastupnike da se izjasne o inicijativi zastupnika Irfana Čengića za dostavljanje zastupnicima materijala koji su u skupštinskoj proceduri.*

*Za je glasalo 31 zastupnik, protiv i suzdržanih nije bilo.*

*Skupština je jednoglasno (31 „ZA“) usvojila navedenu inicijativu.*

Prešlo se na realizaciju druge tačke dnevnog reda.

**AD-2.**

**PRIJEDLOG ODLUKE O PRIVREMENOM FINANSIRANJU POTREBA KANTONA SARAJEVO ZA PERIOD OD 1. 1. DO 31. 3. 2023. GODINE**

Zastupnici su materijal za ovu tačku dobili uz poziv za sjednicu. Uvodno izlaganje u ime Predlagača podnio je ministar Davor Čičić.

Nakon uvodno izlaganja, pitanje je postavio zastupnik Mahir Dević, a u diskusiji koja je potom otvorena učestvovali su zastupnici Irfan Čengić, Haris Zahiragić, Vildana Bešlija, Miomirka Melank, Mahir Dević, Muamer Bandić, Damir Marjanović, Vibor Handžić, Faruk Kapidžić, Aljoša Čampara.

Dopredsjedavajući Vibor Handžić, koji je u međuvremenu preuzeo predsjedavanje sjednicom, pozvao je *zastupnike da pristupe izjašnjavanju o Prijedlogu odluke o privremenom finansiranju potreba Kantona Sarajevo za period od 01.01. do 31.3. 2023. godine.*

*Skupština je jednoglasno (31 „ZA“) donijela ovu Odluku.*

Realizacija tačke tri.

#### **AD-3.**

#### **PRIJEDLOG ODLUKE O DAVANJU SAGLASNOST NA ODLUKU O PRIVREMENOM FINANSIRANJU ZAVODA ZDRAVSTVENOG OSIGURANJA KANTONA SARAJEVO ZA PERIOD 1. 1. 2023. GODINE DO 31. 3. 2023. GODINE**

Zastupnici su materijal dobili u dopuni materijala za sjednicu. Obzirom da su se aklamacijom izjasnili da nije potrebno uvodno izlaganje po ovom materijalu, te da se niko nije prijavio za pitanja ili diskusiju, dopredsjedavajući Vibor Handžić je pozvao *zastupnike da pristupe izjašnjavanju o Prijedlogu odluke o davanju saglasnosti na Odluku o privremenom finansiranju Zavoda zdravstvenog osiguranja Kantona Sarajevo za period 01.01.2023. godine do 31. 3.2023. godine.*

*Skupština je jednoglasno (32 „ZA“) donijela ovu Odluku.*

Realizacija tačke četiri.

#### **AD-4.**

#### **PRIJEDLOG ODLUKE O DAVANJU SAGLASNOSTI NA ODLUKU O PRIVREMENOM FINANSIRANJU POTREBA JAVNE USTANOVE SLUŽBA ZA ZAPOŠLJAVANJE KANTONA SARAJEVO- SARAJEVO ZA PERIOD 01.01.2023. GODINE DO 31. 3. 2023. GODINE**

Materijal je zastupnicima dostavljen u dopuni materijala za sjednicu. Zastupnici su smatrali da nije potrebno uvodno izlaganje i nije bilo prijavljenih za pitanja ili diskusiju.

Dopredsjedavajući Vibor Handžić je pozvao *zastupnike da pristupe izjašnjavanju o Prijedlog odluke o davanju saglasnosti na Odluku o privremenom finansiranju potreba Javne ustanove Služba za zapošljavanje Kantona Sarajevo-Sarajevo za period 1. 1. 2023. godine do 31. 3. 2023. godine.*

*Skupština je jednoglasno (32 „ZA“) donijela ovu Odluku.*

Prešlo se na realizaciju tačke pet.

AD-5.

**PRIJEDLOG ODLUKE O IZBORU PREDSEDAVAJUĆIH, ZAMJENIKA PREDSEDAVAJUĆIH I ČLANOVA STALNIH RADNIH TIJELA SKUPŠTINE KANTONA SARAJEVO**

Materijal je zastupnicima dostavljen u dopuni materijala za sjednicu.

Dopredsjedavajući Vibor Handžić je pozvao predsjedavajućeg Komisije za izbor i imenovanja i administrativna pitanja Skupštine Kantona Sarajevo Elvedina Okerića da podnese uvodne napomene.

Nakon toga je dopredsjedavajući otvorio mogućnost postavljanja pitanja što je učinio zastupnik Mahir Dević, a predsjedavajući Okerić mu je odgovorio na postavljeno pitanje.

Potom je otvorena diskusija u kojoj su učestvovali zastupnici Haris Zahiragić, Mahir Dević, Faruk Kapidžić, Vildana Bešlija, Aljoša Čampara, Muamer Bandić, Kemal Ademović, Elvis Vreto i Elvedin Okerić.

Predsjedavajući je potom kao zaključak diskusije predložio da se napravi kraća pauza tokom koje će se sastati Komisija za izbor i imenovanja i administrativna pitanja i predložiti zamjenu člana Komisije za sigurnost novim članom ispred opozicionih stranaka Harisom Zahiragićem.

*U nastavku nakon pauze, predsjedavajući je pozvao zastupnike da se izjasne o Prijedlogu odluke o izboru predsjedavajućih, zamjenika predsjedavajućih, članova stalnih radnih tijela Skupštine Kantona Sarajevo, sa amandmanom koji je Komisija za izbor i imenovanja i administrativna pitanja u međuvremenu dostavila, a u kom se dosadašnji član Komisije za sigurnost Igor Stojanović zamjenjuje novim članom Harisom Zahiragićem.*

Skupština je jednoglasno (26 „ZA“) donijela ovu Odluku.

Realizacija tačke šest.

AD-6.

**PRIJEDLOG ODLUKE O IMENOVANJU PREDSEDNIKA, ZAMJENIKA PREDSEDNIKA, ČLANOVA ODBORA ZA JAVNA PRIZNANJA KANTONA SARAJEVO**

Materijali su dostavljeni zastupnicima u dopuni za sjednicu.

Predsjedavajući je podnio uvodno izlaganje po ovoj tački, obzirom da je predsjedavajući Komisije za izbor i imenovanja i administrativna pitanja.

Obzirom da nije bilo zainteresovanih zastupnika za pitanja ili diskusiju, predsjedavajući je pozvao zastupnike da pristupe izjašnjavaњу o *Prijedlogu odluke o imenovanju predsjednika, zamjenika predsjednika, članova Odbora za javna priznanja Kantona Sarajevo.*

Skupština je većinom glasova ( 22 „ZA“, protiv niko i 3 „SUZDRŽANA“) donijela ovu Odluku.

**AD-7.**

**PREDLOG ODLUKE O PRIHVATANJU OSTAVKE I RAZRJEŠENJU ČLANA ODBORA ZA ŽALBE JAVNO SKUPŠTINE KANTONA SARAJEVO**

Materijali su dostavljeni u dopuni dnevnog reda.

Kao predsjedavajući Komisije za izbor i imenovanja i administrativna pitanja, predsjedavajući Okerić je podnio uvodno izlaganje po ovoj tački.

Nije bilo zainteresovanih zastupnika za pitanja ili diskusiju, te je predsjedavajući zamolio zastupnice i zastupnike *da pristupe izjašnjavanju o Prijedlog odluke o prihvatanju ostavke i razrješenju člana Odbora za žalbe javnosti Skupštine Kantona Sarajevo.*

*Skupština je jednoglasno (25 „ZA“) donijela ovu Odluku.*

Predsjedavajući je konstatovao da je iscrpljen dnevni red Prve radne sjednice i prije zaključivanja iste pozvao je zastupnike koji su članovi Zakonodavno-pravne komisije, Komisije za boračka pitanja i Komisije za prostorno uređenje, stambeno-komunalnu politiku, infrastrukturu i zaštitu okoliša da ostanu na zakazanim prvim sjednicama svojih komisija.

Nakon toga, predsjedavajući je zaključio rad na Prvoj radnoj sjednici Skupštine Kantona Sarajevo.

Zapisnik izradila:

Lejla Kadrić

**SEKRETAR**

**SKUPŠTINE KANTONA SARAJEVO**

**Aida Zeković**

**PREDSJEDAVALAČI**

**SKUPŠTINE KANTONA SARAJEVO**

**Elvedin Okerić**

**Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo.**